

782—796? VENERANDO PATRI ARNOLDO ABBATI<sup>1</sup> ET SANCTAE CONGREGATIONI HUMILIS LEVITA  
ALBINUS SALUTEM.

Satis mihi placuit religiosa conversatio vestra in Domino, et caritatis humilitas, et ecclesiae ornatus, et domorum, quas in transitu cernebam, constitutio, et dulcissima susceptio, qua me cum magna familiaritate suscepistis<sup>2</sup>; cognoscens in cordibus vestris  
Ioh. 13, 35. illum habere praeparatam habitationem, qui dixit: 'In hoc cognoscent omnes, quia mei discipuli estis, si dilectionem habueritis invicem'. Ideo supplici deprecatione exortans fraternitatem vestram, ut in perfecta permaneatis fideliter caritate, et concordia pacis inter vos vigeat, et oboedientiae decus resplendeat in conversatione vestra, et humilitatis honestas videatur in omni actu vestro, et corporis castitas quasi  
10 lilia floreat in conspectu Dei, et sitis unanimes in omni opere perfecto, oboedientes patri spiritali absque omni contradictione, quia ipse rationem redditurus erit pro vobis in die magno Domini, et vos similiter oboedientiae vestrae plurimam in die illa accepturi eritis mercedem.

Rom. 14, 47. Non est regnum Dei esca et potus, sed caritas in conscientia pura; hae<sup>a</sup> sunt  
itaque victimae, quas monachi singulis horis domino Deo offerre debebunt; his hostiis placabitur maiestas divina; per has semitas regni caelestis portae aperiuntur. Hoc  
Cf. Matth. 22, 11. cogitate iugiter, hoc rememorate semper, in his conversamini deliciis<sup>b</sup>: haec sunt  
nuptialia vestimenta, in quibus superni regis convivia possidere digni efficiamini. Nullus ex vobis avaritiae studeat, nec caducas congregare divitias quaerat; nec unum  
20 habeat absque patris sui licentia nummum: sufficiat unicuique communis vitae iocunditas, seu in vestimentis, seu in cibi potusque religiositate<sup>c</sup>; tantum pater spiritalis praevideat, ne iustam quislibet habeat murmurationem; nec quarumlibet indigentia rerum regularis vitae destruat<sup>d</sup> ordinem. Sit unusquisque contentus secundum facultatem loci et temporis stipendio, quod ei administratur, et quo maiore suffert humilitate indi-  
25 gentiam, si subito eveniat, eo maiorem a Deo accipiat mercedem. Qui pro regno Dei certare desiderat, non debet pro uno calice vini contendere. Nobilissimus omnium creator pater nobiles habere filios cupit: magna generositas est filium esse Dei; sed haec dignitas, tam alta et praeclara, magna morum et conversationis nobilitate obser-  
vari debet.

Quod caritate cogente scripsi vestra humilitas patienter relegere dignetur et, si quid memoriae dignum ex his meis litteris invenietis, ob intentionem salutis vestrae et recordationem nominis nostri in thesauro cordis vestri recondite, quatenus divina pietas vos in gaudium supernae beatitudinis deducat, et mihi peccatori veniam peccatorum meorum per sanctas orationes vestras concedat. Vestram sanctitatem  
35 superni regis pietas in omni bona conversatione proficere faciat, fratres carissimi.

## 55.

*Alcvinus discipulum quendam aegrotum solatur et ad peccatorum confessionem hortatur.*  
782—796?

*Cod. H fol. 15—16'.*

*Edd. F 231, J 291. — Migne col. 457.*

40

<sup>a</sup>) haec H.    <sup>b</sup>) deliciis H.    <sup>c</sup>) relegiositate corr. in religiositate H.    <sup>d</sup>) distruat H.

1) Cui monasterio praefuerit plane ignoratur, nisi forte sit Arnulfus abbas S. Filiberti in insula Heri, cui Ludovicus a. 819. diploma dedit (Mühlbacher Reg. n. 667). 2) Haec ad id tempus mihi videntur referenda esse, quo Alcvinus nondum in monasterium Turonense secesserat.